



王陽明集十七

別錄
公移

廿二

特 別
013
3196
18



門 口 13
號 3196
卷 18

陽明先生別錄卷之十二

公移五

提督軍務兼理巡撫批行事宜 共五十條

其一 批臨江府耆民建立生祠呈

正德十五年五

十月初十日

據臨江府清江縣耆民董惟謙等呈立知府戴德孺生祠看得知府戴德孺素堅清白之守久著循良之政今其去任而郡民建祠報德此亦可見天理之在人心自不容已仰該府縣官俯順民情量行撥人看守非徒激勵後人俾有所興且以成就民德使歸於

昭和十七年
四月二十日
購求

厚繳

其二批吉安府救荒申

五月

據吉安府申備廬陵縣申看得所申要將陳腐倉穀賑給貧民此本有司之事當茲災患正宜舉行但誠於愛民者不徒虛文之舉忠於謀國者必有深長之思故目前之災雖所宜恤而日後之患尤所當防以今事勢而觀後患決有難測近據崇仁縣知縣祝鰲申要將預備倉穀凶荒之時則倍數借給以濟貧民收成之日則減半還官以實儲蓄頗有官民兩便已經本院批准照議施行看得各縣事體不甚相遠此

議或可通行仰布政司再加裁酌議處施行各屬遇災地方凡積有稻穀者俱查照此議而行仍仰各該掌印官務要身親給散使貧民得實惠之沾官府無虛出之弊乃可其一應科派物料等項當茲兵亂之餘加以水災民不聊生豈堪追併仰布政司酌量緩急分別重輕畧定徵收先後之次備行各屬以漸而行庶幾用一緩二之意少免醫瘡剜肉之苦通仰該司定議施行回報

其三案行湖西道處置豐城水患

六月初九日

為處置地方水患事查得先據分巡南昌道副使顧

應祥呈 豐城縣申稱被水冲倒地名毛家塢等處
係干重務欲行動支官錢修理緣由備呈到院看得
前項决堤若不及時修築秋水再泛民害益深該道
所議悉中事宜已經批仰即先行該縣知縣顧必動
支見在庫銀坐委縣丞沈廷用專理其事一面督工
分投修築一面備行本府知府吳嘉聰親詣該縣查
照所議督同顧必再加詢訪計議務在周悉停當備
由呈報施行近該本院撫臨該縣督同巡守該道副
使顧應祥叅議周文光知縣等官顧必等看得前項
决堤漸侵縣治委係緊急民害但正當水衝欲便築

塞必須依倣水簾梳之法用大船數十裝載磚石沙
土阻遏水勢方可施工已將水簾梳等法面與知縣
顧必等備細指說督令遵照施行間隨據袁州衛運
糧指揮余恭呈為僭運糧儲事開稱本衛原額運糧
淺船一百九十二隻內除見運及已賣完糧并漂流
船隻外見在不堪裝運淺船一十四隻實難修艤乞
要變賣價銀以備釘造船隻下年裝運等因據此為
照豐城縣即今見要破損大船塞阻水勢所據前項
船隻合行查處變賣以濟急務為此一仰江西分巡
湖西道抄案仰抄案回道着落當該官吏照依案驗

內事理即便會同巡守南昌道官將袁州衛不堪裝運淺船查明的有若干就便督同該衛官旗人等從公估計每隻值價若干差官押解前去該縣裝載沙石修築決堤就行該縣見貯官庫銀兩內照數動支給與各船旗軍以為釘造船隻之費如此則築堤者易於興工而賣船者速於得價以為彼此兩得其濟所賣船隻不許多估虧損及容姦人作弊侵剋旗甲已賣運船曾否告鳴官司賣銀完糧惟復私自變賣銀兩及漂流船隻有無所在官司文憑可據亦就通行開查具由回報俱毋違錯抄案官吏具依准呈來

一仰江西分巡南昌道除行分巡湖西道會將袁州衛不堪裝運淺船查明云開查具由回報外仰抄案回道着落當該官吏照依案驗內事理即會本道分守官查照督理上緊完報施行俱毋違錯抄案官吏具依准呈來

一仰南昌府豐城縣除行分巡湖西道會同守巡南昌該道官將袁州衛不堪裝運淺船云及容作弊侵剋外仰抄案回縣着落當該官吏照依案驗內事理即行知縣顧必速差能幹官員帶領人夫前來樟樹地方接駕前項淺船到縣照依該道

估定價值於官庫銀內支給各船旗軍收領取具
領狀附卷就便擇日起衆催督委官縣丞沈廷用
遵照本院面授水簾桅等法興工修築務將前船
銜結勾連多用串關扇束縛堅牢足障水勢以便
施工毋爲摧蕩虛費財力俱毋違錯抄案官吏具
依准呈來

其四批撫州府同知汪嵩乞休呈

七月十九日

據撫州府同知汪嵩呈看得同知汪嵩久存恬退遇
難復留已盡報 國之忠仍堅歸田之請出處得宜
誠可嘉尚但本官政素獲民年未甚老已經勉留照

舊供職而本官稱疾愈篤求退益懇仰府再行查看
如果病勢難留准令就彼致仕該府以禮起送還鄉
仍備行原籍官司歲時以禮優待務獎恬退以勵鄙
薄此繳

其五批提學僉事邵銳乞休呈

七月二十二日

據江西按察司呈看得提學僉事邵銳求歸誠切堅
守考槃之操而按察使伍文定挽留懇至曲盡緇衣
之情是亦人各有志可謂兩盡其美然求歸者雖亦
明哲保身使皆潔身而去則君臣之義或幾乎息挽
留者雖以爲國惜賢使皆覲顏在位則高尚之風亦

日以微況本院自欲求退而未能安可沮人之求退
仰該司備行本官再加酌量於去就之間務求盡合
於天理之至必欲全身遠害則掛冠東門亦遂聽行
所志若猶眷顧 宗國未忍割情獨往且可見危受
命同舟共艱稍須弘濟却遂初心則臨難之義既無
苟免於搶攘之日而恬退之節自可求伸於事定之
餘興言及此中心愴而此繳

其六案行廣東按察司立縣事宜

七月二十八日

據副使汪王呈稱 云 卷查先為圖議邊方後患事
准兵部咨 云 續據湖廣按察司呈奉巡撫湖廣都

御史秦

案驗

云

候本院撫臨至日會行議處

奏定奪施行隨據副使汪玉呈

云

看得立縣之舉

今且三年而兩省會議猶是道傍之談似此往復不
已畢竟何時定計自昔舉事須順人情凡今立縣專
為弭亂若使兩地人心未協遂爾執已見而行則是
今日定亂之圖反為異時起爭之本今江西安仁東
鄉各縣紛紜奏告連年不息即其徵矣除行該道兵
備官上緊約會廣東各官親詣地方拘集里老年高
有識備詢曲諭務在衆議調停兩情和協就行相度
地勢會計財力監追起工然後各自回任若使議終

不合必欲各自立縣亦須酌裁適均要見廣東於高
宿立縣都圖若干湖廣於筮籬立縣都圖若干城池
高廣若干官負裁減若干異時賦役兩地逃躲若何
區處盜賊彼時出沒若何緝捕一應事宜逐條開議
須於不同之中務求通融之術不得徒事空言彼此
推托苟延目前不顧後患異時追論致禍之因罪亦
終有不免除批行湖廣該道兵備官查照外仰抄案
回司會同布政司各行該道守巡兵備等官約會湖
廣各官面議停當一面會計工料委官及時興工一
面備由開詳以憑覆 奏毋推延執拗致有他虞斷

行參究不恕仍行兩廣提督并巡按衙門查照督催
施行

其七牌行江西都布按三司及南昌府停止

工役

八月初九日

先該本院看得江西兵荒之餘重以洪水為災民窮
財盡正當休養撫恤各該衙門一應修理公廨工役
俱宜停止已經案仰各司即將工役悉行停止其勢
不容已者亦待秋成之後民困稍蘇方許以次呈奪
去後近因本院出巡訪得各該官負不思地方兵亂
水患小民困苦已極方求蠲賦稅出內帑欲賑而未

能輒復紛然修理事屬故違本當叅究但傳聞未的姑再查禁為此仰各抄案回司即查前項工程前此果否委行停止近來是否重復興工具由呈報以憑施行毋得隱諱違錯不便

其八牌行福建布政司禮取副提舉舒芬

八月二十三日

照得當職奉命提督軍務兼理巡撫深慮才微責重無以仰稱任使合求賢能以資贊翼訪得福建市舶提舉司副提舉舒芬志行高古學問深醇直道不能趨時長才足以濟用合就延引以匡不及為此

牌仰福建布政司官吏即行泉州府措辦羊酒禮幣賚送本官用見本院優禮之意仍照例起關應付前赴軍門以憑諮訪本官職任就委別官暫替

其九立南贛鄉約

閏八月

咨爾民昔人有言蓬生麻中不扶而直白沙在泥不染而黑民俗之善惡豈不由於積習使然哉往者新民蓋常棄其宗族畔其鄉里四出而為暴豈獨其性之異其人之罪哉亦由我有司治之無道教之無方爾父老子弟所以訓誨戒飭於家庭者不早薰陶漸染於里閭者無素誘掖獎勸之不行連屬叶和之無

具又或憤然相激狡僞相殘故遂使之靡然日流於
惡則我有司與爾父老子弟皆宜分受其責嗚呼往
者不可及來者猶可追故今特爲鄉約以協和爾民
自今凡爾同約之民皆宜孝爾父母敬爾兄長教訓
爾子孫和順爾鄉里死喪相助患難相恤善相勸勉
惡相告戒息訟罷爭講信修睦務爲良善之民共成
仁厚之俗嗚呼人雖至愚責人則明雖有聰明責已
則昏爾等父老子弟毋念新民之舊惡而不與其善
彼一念而善即善人矣毋自恃爲良民而不修其身
爾一念而惡即惡人矣人之善惡由於一念之間爾

等慎思吾言毋忽

一同約中推年高有德爲衆所敬服者一人爲約
長二人爲約副又推公直果斷者四人爲約正通
達明察者四人爲約史精健廉幹者四人爲知約
禮儀習熟者二人爲約替置文簿三扇其一扇備
寫同約姓名及日逐出入所爲知約司之其二扇
一書彰善一書糾過約長司之
一同約之人每一會人出銀三分送知約具飲食
毋大奢取免飢渴而已
一會期以月之望若有疾病事故不及赴者許先

期遣人告知約無故不赴者以過惡書仍罰銀一兩公用

一立約所於道理均平之處擇寺觀寬大者爲之一彰善者其辭顯而決糾過者其辭隱而婉亦忠厚之道也如人有不弟母直曰不弟但云聞某於事兄敬長之禮頗有未盡某未敢以爲信姑書之以俟凡糾過惡皆例此若有難改之惡且勿糾使無所容或激而遂肆其惡矣約長副等須先期陰與之言使當自首衆共誘掖獎勸之以與其善念姑使書之使其可改若不能改然後糾而書之又

不能改然後白之官又不能改同約之人執送之官明正其罪勢不能執戮力協謀官府請兵滅之一同約之人凡有危疑難處之事皆須約長會同約之人與之裁處區畫必當於理濟於事而後已不得坐視推託陷人於惡罪坐約長約正諸人一寄庄人戶多於納糧當差之時躲回原籍往往負累同甲今後約長等勸令及期完納應承如蹈前弊告官懲治削去寄庄

一本地大戶異境客商放債收息合依常例毋得磊美或有貧難不能償者亦宜以理量寬有等不

仁之徒輒便捉鎖磊取挾寫田地致令窮民無告
去而爲盜今後有此告諸約長等與之明白償還
不及數者勸令寬捨取已過數者力與追還如或
恃強不聽率同約之人明之官司

一親族鄉隣往往有因小忿投賊復讐殘害良善
釀成大患今一應闢毆不平之事鳴之約長等公
論是非或約長聞之即與曉諭解釋敢有仍前妄
爲者率諸同約呈官誅殄

一軍民人等若有陽爲良善陰通賊情販買牛馬
走傳消息歸利一已殃及萬民者約長等率同約

諸人指實勸戒不悛呈官究治

一吏書義民總甲里老百長弓兵機快人等若攬
差下鄉索求賫發者約長率同約呈官追究

一各寨居民昔被新民之害誠不忍言但今旣許
其自新所占田產已令退還毋得再懷前讐致擾
地方約長等常宜曉諭令各守本分有不聽者呈
官治罪

一投招新民因爾一念之善貸爾之罪當痛自克
責改過自新勤耕勤織平買平賣思同良民無以
前日名目甘心下流自取滅絕約長等各宜時時

提撕曉諭如踵前非者呈官懲治

一男女長成各宜及時嫁娶往往女家責聘禮不充男家責嫁裝不豐遂致愆期約長等其各省諭諸人自今其稱家之有無隨時婚嫁

一父母喪葬衣衾棺槨但盡誠孝稱家有無而行此外或大作佛事或盛設宴樂傾家費財俱於死者無益約長等其各省諭約內之人一遵禮制有仍蹈前非者即與糾惡簿內書以不孝

一當會前一日知約預於約所灑掃張具於堂設告諭牌及香案南向當會日同約畢至約贊鳴鼓

未得
其本

三衆皆詣香案前序立北面跪聽約正讀告諭畢約長合衆揚言曰自今以後凡我同約之人祇奉戒諭齊心合德同歸於善若有二三其心陽善陰惡者神明誅殛衆皆曰若有二三其心陽善陰惡者神明誅殛皆再拜興以次出會所分東西立約正讀鄉約畢大聲曰凡我同盟務遵鄉約衆皆曰是乃東西交拜興各以次就位少者各酌酒於長者三行知約起設彰善位於堂上南向置筆硯陳彰善簿約贊鳴鼓三衆皆起約贊唱請舉善衆曰是在約史約史出就彰善位揚言曰某有某善某

能改其過請書之以爲同約勸約正遍質於衆曰
如何衆曰約史舉甚當約正乃揖善曰進彰善位
東西立約史復謂衆曰其所舉止是請各舉所知
衆有所知即舉無則曰約史所舉是矣約長副正
皆出就彰善位約史書簿畢約長舉杯揚言曰某
能爲某善某能改其過是能修其身也某能使某
族人爲某善改其過是能齊其家也使人人若此
風俗焉有不厚凡我同約當取以爲法遂屬於其
善者善者亦酌酒酬約長曰此豈足爲善乃勞長
者過獎其誠惶忤敢不益加砥礪期無負長者之

教皆飲畢再拜謝約長約長答拜興各就位知約
徹彰善之席酒復三行知約起設糾過位於階下
北向置筆硯陳糾過簿約贊鳴鼓三衆皆起約贊
唱請糾過衆曰是在約史約史就糾過位揚言曰
聞某有某過未敢以爲然姑書之以俟後圖如何
約正遍質於衆曰如何衆皆曰約史必有見約正
乃揖過者出就糾過位北向立約史復遍謂衆曰
某所聞止是請各言所聞衆有所聞即言無則曰
約史所聞是矣於是約長副正皆出糾過位東西
立約史書簿畢約長謂過者曰雖然姑無行罰惟

速改過者跪請曰某敢不服罪自起酌酒跪而飲
曰敢不速改重爲長者憂約正副史皆曰某等不
能早勸諭使子陷於此亦安得無罪皆酌自罰過
者復跪而請曰某旣知罪長者又自以爲罰某敢
不即就戮若許其得以自改則請長者無飲某之
幸也趨後酌酒自罰約正副咸曰子能勇於受責
如此是能遷於善也某等亦可免於罪矣乃釋爵
過者再拜約長揖之興各就位知約徹糾過席酒
復二行遂飲飯畢約贊起鳴鼓三唱申戒衆起約
正中堂立揚言曰嗚呼凡我同約之人明聽申戒

人孰無善亦孰無惡爲善雖人不知積之旣久自
然善積而不可掩爲惡若不知改積之旣久必至
惡極而不可赦今有善而爲人所彰固可喜苟遂
以爲善而自恃將日入於惡矣有惡而爲人所糾
固可愧苟能悔其惡而自改將日進於善矣然則
今日之善者未可自恃以爲善而今日之惡者亦
豈遂終於惡哉凡我同約之人盍共勉之衆皆曰
敢不勉乃出席以次東西序立交拜興遂退

其十牌行嶺北道集兵操練

閏八月二十七日

先該本院行仰本道將原調上下輪班操演機快各

留該縣委官管束遵照本院原定伍法時常操習武藝者守城池毋容懈弛若奉本院明文調取便就依期速赴軍門聽候去後今照所轄地方盜賊不時竊發所據原散兵快人等應該通取赴教場操演爲此牌仰本道官吏即將寧都等各縣原定上下班次兵快通令整備鮮明器械取赴贛州教場大閱武藝考較勤惰俱限九月十五日齊到敢有遲違治以軍法

其十一案行嶺北道禁約操軍

九月十七日

照得本院調到寧都等縣官兵機快人等見在贛州教場住劄操閱中間恐有不守軍令罪及無辜應合禁約隨據副使王度呈開合禁事宜叅酌相同爲此仰抄案回道即行出給告示張掛教場曉諭官兵機快各加遵守如有違犯事情重大者拏送軍門依軍令斬首其事情稍輕者該道徑自究治發落呈本院查考

計開

一各兵但有擅動地方一草一木者照依軍令斬首示衆

一各兵但有管哨官總指稱神福饋送打點等項名色科派銀物自一分以上俱許赴該道面告究

治

一管哨官凡遇歇操之日並在營房居住鈴束機兵教演武藝敢有在街遊蕩及挾妓飲酒朋夥喧譁者訪出網打一百

一各兵但有疾病事故許管哨官稟明醫驗不許顧人頂替如有用財買求地方光棍替身上操仰該管總小甲拏獲首送該道枷號如隱情不首事發連總小甲一體枷號

一各兵在市買辦柴米酒肉等項俱要兩平交易如有恃強多占分兩被人告發枷號示衆

一管哨官凡遇各兵鬪毆喧鬧等項小事量行懲

治大事稟該道拏問不許縱容爭兢囂亂轅門

一各歇操之日各將隨有器械務要整刷鋒利鮮明毋得臨時有誤如平日懶惰不行修理上操之際弦矢斷折銃砲不響旗幟不明查出網打一百一各兵遇上班之日不許因便赴該道府訴告家鄉戶婚田土等項事情查出痛責四十

一各兵上街行走俱要懸帶小木牌一面上寫某哨官總下旗人年甲籍貫辨別如有隱下兵打名色另着別樣衣冠暗入府縣挾騙官吏及來軍門

并該道門首打探消息訪出枷號不恕
一各兵領到工食銀兩俱要搏節用度謹慎收放
如有奢侈用度及被人偷盜縱來訴告缺失俱不
准理仍重加責治

一各該上班兵夫如有限期未滿先行逃回者差
人原籍拏來用一百斤大枷枷號教場門首三箇
月滿日網打一百仍依例問發邊衛充軍

一各哨官并兵夫有軍門一應便宜及利所當興
害所當革者許赴軍門及該道直白條陳不許諸
人阻當

其十一牌行吉安府旌獎節婦

九月初九日

訪得吉水縣民人陳文繼妻黃氏廬陵縣生員胡充
妻曾氏俱各少年守志節操堅厲遠近傳揚士夫稱
嘆當茲風俗頹靡之時合行旌獎以勵澆薄爲此仰
府官吏即行吉水廬陵二縣掌印官支給無礙官錢
買辦禮儀前去各家盛集鄉隣老幼之人宣揚本婦
志節之美務使姻族知所崇重里巷知所表式用獎
貞節以激偷鄙仍備述各婦節操志行始末及將獎
勵過緣由同依准隨牌繳報以憑施行

其十三牌行嶺北道興舉社學

九月十三日

看得贛州社學鄉館教讀賢否尚多淆雜是以詩禮之教久已施行而淳厚之俗未見興起爲此牌仰嶺北道督同府縣官吏即將各館教讀通行詢擇務學術明正行止端方者乃與茲選官府仍籍記姓名量行支給薪米以資勤苦優其禮待以示崇勸其各童生之家亦各通行戒飭務在隆師重道教訓子弟毋得因仍舊染習爲偷薄自取愆咎

其十四案行嶺北道頒定里甲雜辦

九月十五日

據龍南縣申稱先年里甲使用俱係丁糧分派照日

應當以致多寡不均要將正德十六年里甲通行查審除逃絕人丁外將一年使用春秋祭祀軍需歲報使客夫馬等項俱於丁糧議處每石出銀若干陸續稱收貯庫推舉老人公同里長使用註簿儻有餘剩照多寡給還等因到院簿查先該贛州府知府盛茂同知夏克義議過贛縣里長額辦雜辦已經批仰嶺北道再加酌議續據副使王度呈稱查算本縣額辦使用該銀三千七百三十一兩七分二釐四毫九絲原轄里長一百一十里內除十里逃絕止有一百里十六年分每糧一石算一分人丁二丁算一分一年

丁糧共該一千一百二十六分半每分該出銀三兩三錢一分二釐一毫一絲一忽合行該縣印鈐收銀文簿一扇將各都該辦銀兩分爲二次查追貯庫又置文簿二扇一寫本縣支出數目一發支用人役註附每月選有行止老人二名公同直日里長赴縣支領每月備具用過揭帖三本一送都察院一分巡道一本府各不時稽察年終羨餘並聽上司查處以補無名徵需府縣不得擅支仍將各里該納分數刷印告諭遍張鄉村曉諭如有官吏額外科派及收銀人役多取火耗秤頭并里甲恃頑不辦許各呈告以憑

拿問呈乞照詳又經批仰照議即行該縣永永查照仍備刻告示遍行曉諭及多行刷印頒給各里收照以防後奸今申前因看與本院新定則例相同及照寧都等九縣及南安所屬大庾等縣事體民情當不相遠合就通行查編爲此仰抄案回道即便速行各縣俱查本院近定規則各照丁糧多寡派編銀兩追收貯庫選委行止端實老人公同該日里長支用置簿稽察刊榜曉諭禁約事宜悉照原議施行敢有違犯者就便拏問呈詳通取各縣派定過緣由類報查考

其十五批江西布政司設縣呈

十月初二日

據江西布政司呈將新淦縣知縣田邦傑建言設縣緣由看得近來各處設縣皆因窮山絕谷盜賊盤據人迹罕通聲教不及不得已而為權宜之計若腹裡平衍四通五達之區止宜減并不貴增添蓋增一縣即增一縣之事官吏供給學校倉庫園獄差徭一應煩費未易悉舉且又有彼此推避之奸互相牽制之患計其為利不償所害古人謂省吏不如省官省官不如省事凡今作事貴在謀始仰布政司再行會同三司各官從長計議設縣之外果無別策可以致理

具議呈奪繳

其十六案行江西布政司議處官吏廩俸

十月初十日

照得近來所屬各州縣衛所倉場等衙門大小官吏以贓問革者相望而冒犯接踵究詢其由皆云家口衆多日給不足俸資所限本以涼薄而近例減削又復日甚加有上下接應之費出入供送之繁窮窘困迫計出無聊中間亦有甘貧食苦刻勵自守者徃徃狼狽縲縷至於任滿職革債負纏結不得去歸其鄉夫貪墨不才法律誠所難貸而其情亦可矜憫夫忠

信重祿所以勸士在昔任人既富方穀庶民在官祿足代耕此古今之通義也 朝廷賦祿百司厚薄既有等級要皆使得裕其資養免其內顧然後可望以盡心職業責以廉耻節義今定制所限既不可得而擅增至於例所應得又從而裁削之使之仰事俯育且不能遂是陷之於必貪之地而責之以必廉之守中人之資將有不能而况其下者之衆乎所據前項事理非獨人情有所未堪其於政體亦有所損合行會議查處爲此仰抄案回司即便會同都按二司多官叅酌事理輕重及查在外官員自二品至九品并

雜職吏胥等俸米除本色外其折色原例每石作銀若干於何年月裁減作銀若干應否復舊或量行加增務要議處停當呈來定奪施行

其十七咨六部伸理冀元亨

十月十五日

照得湖廣常德府武陵縣舉人冀元亨忠信之行孚於遠邇孝友之德化於鄉閭本職往年謫官貴州本生曾從講學近來南贛延之教子時因寧藩宸濠潛謀不軌虐焰日張本職封疆連屬欲爲曲突徙薪之舉則既無其由將爲發奸摘伏之圖則又無其實偶值宸濠飾詐要名禮賢求學本職因使本生乘機往

見宸濠冀得因事納規開陳大義沮其邪謀如其不可
勸喻亦因得以審察動靜知其叛逆遲速之機庶
可密爲禦備本生旣與相見議論大相矛盾宸濠以
本職所遣一時雖亦含忍遣發而毒怒不已陰使惡
黨四出訪緝欲加陷害本生素性愿恪初不之知而
本職風聞其說當遣密從間道潛回常德以避其禍
後宸濠旣敗痛恨本職起兵攻剿雖反噬之心無所
不至而天理公道所在無因得遂其奸乃以本生係
本職素所愛厚之人輒肆抵誣謂與同謀將以泄其
讐憤且本生旣與同謀則宸濠舉叛之日本生何故

不與共事却乃反回常德聚徒講學宸濠素所同謀
之人如李士實劉養正王春之流宸濠曾不一及而
獨口稱本生與之造始此其挾讐妄指蓋有不待辨
說行道之人皆能知者但當事之人不加詳察輒爾
聽信遂陷本生一至於此本生篤事師之義懷報國
之忠蹈不測之虎口將以轉化凶惡潛消奸頑論心
原迹尤當顯蒙賞錄乃今身陷俘囚妻子奴虜家業
蕩盡宗族遭殃信奸人之口爲叛賊泄憤報讐此本
職之所爲痛心刻骨日夜冤憤而不能自己者也本
職義當與之同死幾欲爲之具 奏伸理而本生雖

在拘囚傳聞不一或以爲既釋或以爲候 旨兼慮
當事之人或不見諒反致激成其罪故復隱忍到今
又恐多事紛紜之日萬一玉石不分竟使忠邪倒置
徒以沮義士之志而快叛賊之心則本職後雖繼之
以死將亦無以贖其痛恨爲此合行具咨貴部煩請
咨詢鑒察特賜扶持分辨施行

咨都察院轉行十三道

照會大理寺同

其十八獎勵主簿于旺

十月二
十六日

看得近來所屬下僚鮮能持廉守法訪得興國縣主

簿于旺獨能操持清白處事詳審近委管理抽分纖
毫無玷奸弊刻革撫屬小官之內誠不可見相應獎
勵以勸其餘爲此牌仰官吏即便支給商稅銀兩買
辦花紅彩段羊酒各一事并將本院發去官馬一匹
帶鞍一付備用鼓樂差官以禮送付本官用見本院
獎勵之意毋得違錯

其十九申諭十家牌法

十月二
十六日

本院所行十家牌諭近來訪得各處官吏類多視爲
虛文不肯着實奉行查考據法即當究治尚恐未悉
本院立法之意故今特述所以再行申諭凡置十家

牌須先將各家門面小牌挨審的實如人丁若干必查某丁爲某官吏或生員或當某差役習某技藝作某生理或過某房出贅或有某殘疾及戶籍田糧等項俱要逐一查審的實十家編排既定照式造冊一本留縣以備查考及遇勾攝及差調等項按冊處分更無躲閃脫漏一縣之事如視諸掌每十家各令挨報甲內平日習爲偷竊及喇唬教唆等項不良之人同具不致隱漏重甘結狀官府爲置舍舊圖新簿記其姓名姑勿追論舊惡令其自今改行遷善果能改化者爲除其名境內或有盜竊即令此輩自相挨緝

若係甲內漏報仍并治同甲之罪又每日各家照依牌式輪流沿門曉諭覺察如此即奸僞無所容而盜賊亦可息矣十家之內但有爭訟等事同甲即時勸解和釋如有不聽勸解恃強凌弱及誣告他人者同甲相率稟官官府當時量加責治省發不必收監淹滯凡遇問理詞狀但涉誣告者仍要查究同甲不行勸稟之罪又每日各家照牌互相勸諭務令講信修睦息訟罷爭日漸開導如此則小民益知爭鬪之非而詞訟亦可簡矣凡十家牌式其法甚約其治甚廣有司果能着實舉行不但盜賊可息詞訟可簡因是

而修之補其偏而救其弊則賦役可均因是而修之
連其伍而制其什則外侮可禦因是而修之警其薄
而勸其厚則風俗可淳因是而修之導以德而訓以
學則禮樂可興凡有司之有高才遠識者亦不必更
立法制其於民情土俗或有未備但循此而潤色脩
舉之則一邑之治真可以不勞而致今特畧述所以
立法之意再行申告言之所不能盡者其各爲我精
思熟究而力行之毋徒紙上空言搪塞竟成掛壁之
虛文則庶乎其可矣

其二十申諭十家牌法增立保長

十一月初八日

先該本院通行撫屬編置十家牌式爲照各甲不立
牌頭者所以防脅制侵擾之弊然在鄉村遇有盜賊
之警不可以無統紀合立保長督領庶衆志齊一爲
此仰抄案回司即行各道守巡兵備等官備行所屬
各府州縣於各鄉村推選才行爲衆信服者一人爲
保長專一防禦盜賊平時各甲詞訟悉照牌諭不許
保長干與因而武斷鄉曲但遇盜警即仰保長統率
各甲設謀截捕其城郭坊巷鄉村各於要地置鼓一
面若鄉村相去稍遠者仍起高樓置鼓其上遇警即
登樓擊鼓一巷擊鼓各巷應之一村擊鼓各村應之

但聞鼓聲各甲各執器械齊出應援俱聽保長調度
或設伏把隘或并力夾擊但有後期不出者保長公
同各甲舉告官司重加罰治若鄉村各家皆置鼓一
面一家有警擊鼓各家應之尤爲快便此則各隨才
力爲之不在牌例之內俱仰督令各縣即行推選增
置仍告諭遠近使各知悉各府仍要不時稽察務臻
實效毋得虛文搪塞查訪得出定行究治不貸

其二十一牌行嶺北道及贛州府頒行社學

教條

十一月

先該本院據嶺北道選送教讀劉伯頌等頗已得人

但多係客寓日給爲難今欲望以開導訓誨亦須量
資勤苦已經案仰該道通加禮貌優待給薪米紙筆
之資各官仍要不時勸勵敦勉令各教讀務遵本院
原定教條盡心訓導視童蒙如己子以啓迪爲家事
不但訓飭其子弟亦復化喻其父兄不但勤勞於詩
禮章句之間尤在致力於德行心術之本務使禮讓
日新風俗日美庶不負有司作興之意與士民趨向
之心而凡教授於茲土者亦未有先矣仍行該縣備
寫案驗事理揭置各學永遠遵照去後今照前項教
條因本院出巡忙迫失於頒給合就查發爲此牌仰

本道府道即將發去教條每學教讀給與二張揭置座右
每日務要遵照訓誨諸生該道該府官員亦要不時
親臨激勵稽考毋得苟應文具遂今日就廢弛

其二十二批湖西道清理未新田糧 月十一

日九

據叅議周文光呈看得江西田糧之弊極於未新相
傳已非一日今欲清理丈量實亦救時切務但恐奉
行不至未免反滋弊端依議定委通判談儲推官陳
相指揮高睿會同該縣知縣翁璣設法丈量該道仍
要再加區畫曲盡物情務仰各官且秉公任事正已格

物殫知竭慮削弊除奸必能一勞永逸方可發謀舉
事如其虛文塞責則莫若熟思審處以俟能者事完
之日悉照該道所議造冊未未遵守施行繳

其二十三批寧都縣祠祀知縣王天與申

十一月十九日

據寧都縣申看得知縣王天與舊隨本院征勦橫水
桶岡諸賊屢立戰功後隨本院討平逆藩竟死勤事
况其平日居官政務修舉威愛兼行仰該縣即從士
民之請建祠報祀用伸士夫之公論以慰小民之遺
思此繳

其二十四仰江西布政司查佃沒官房產

月十

照得逆黨沒官房屋田產等項近經司府出佃與人暫管候命下之日定奪近訪得官民之家不論告佃年月先後地里遠近應否一槩混爭若不預為查處立定規則將來必致大興告擾漸起弊端為此仰抄案回司即查前項沒官房屋田產實計若干處所某年月日期經由某衙門佃與某人務以年月先後為次先儘本縣人戶然後及於異縣先儘本府人戶然後及於異府中間多有勢豪之徒不遵則例妄起

爭訟或不由官府私擅占管占住者該司通行查究呈來以憑拿問參究施行毋得容隱及查報不清未便

其二十五批江西按察司失事官負呈

十五年十一月二十九日

據江西按察司呈看得盜賊之縱橫由於有司之玩法沿流推本實如所呈失事各官俱合提究以警將來但地方多事未免缺人管理除該府縣掌印官姑且記罪責令懲創奮勵修敗補隙務收桑榆之功以贖東隅之失其巡捕等官即行提問以戒怠弛仍備

行各府縣掌印巡捕等官自茲申戒之後悉要遵照
本院近行十家牌諭及於各街巷鄉村建置鑼鼓等
項事理上緊着實舉行嚴督查考務鑒前車之覆預
爲曲突之徙毋得仍前玩忽怠弛但有踈虞定行從
重拏究斷不輕貸此繳

其二十六牌行撫州府同知陸俸等曉諭安

仁餘千頑民

正德十五年十
二月初八日

照得安仁餘千各有梗化頑民數千餘家近住東鄉
逃避山澤沮逆王化已將數年即其罪惡俱合誅夷
無赦但本院撫臨未及况查本院新行十家牌諭各

官因各民頑梗尚未編查若遽行擒剿似亦不教而
殺爲此牌仰撫州府同知陸俸督同東鄉縣知縣黃
堂及安仁縣知縣汪濟民餘千縣知縣馬津親詣各
民村都沿門挨編推選父老子弟知禮法者曉諭教
飭令各革心向化自求生路限在一月之內仇者釋
其怨憤者平其心逋者歸其負罪者伏其辜具由呈
來仍舊待以良善若過限不改不必再加隱忍姑息
徒益長奸縱惡即便密切指實申來以憑別有區處
施行

其二十七告諭安仁餘千東鄉三縣頑民

十二月十五日

告諭安仁餘干東鄉等縣父老子弟自本院始至江西即聞三縣間有頑梗背化之民數千家其時本院方事勦平閩廣湖彬諸蠻寇且所治止於南贛政教有所未及自去歲征討逆藩 朝廷復有兼撫是方之 命隨因 聖駕南巡奔走道路故亦未遑經理今復還省城備詢三司府縣各官及遠近士夫軍民皆謂爾民梗化日久積惡深重已在必誅無赦夫朝廷威令雷厲風行於九夷八蠻之外而中土郡縣之民乃敢悖抗若此不有誅滅以示懲戒亦將何以

爲國欲即發兵剿捕顧其間尚多良善恐致玉石無辨且前此有司所以處之亦有未善何者安仁餘干里分本少於東鄉而地勢又限以山谷顧乃割小益大以啓爾民規避之端其失一矣旣而兩邑之民徃賦不平爭訟兢起其時若盡改復舊亦有何說顧又使其近東鄉者歸安仁近安仁者附東鄉以益爾民紛爭之謗其失二矣及爾等抗拒之迹旣成尚當體悉爾等中間或有難忍之怨屈抑不平之情亦須爲之申泄斷理或懲或戒使兩得其平若終難化諭者即宜斷然正以國法顧乃憚於身任其勞一切惟事

姑息欲逃租賦遂從而免其租賦欲負逋債遂從而
貸其逋債於彼則務隱忍之政而聽其外附於此又
信一偏之詞而責其來歸紀綱不立冠履倒置長奸
縱惡日增月熾以成爾民背叛之罪而陷之必死之
地其失三矣然爾等罪惡皆在本院未臨之前自本
院撫臨以來尚未曾有一言開諭爾等况查本院新
行十家牌諭以弭盜息訟勸善糾惡而各該縣官又
因爾等恃頑梗化皆未曾編查曉諭爾等皆未知悉
其間或有悔創自新之願亦未可知若遽行擒剿是
亦不教而殺雖爾等在前之惡受此亦不為過然於

吾心終有所未盡也近日撫州同知陸俸來稟爾等
尚有可憫之情各懷求生之願故特委同知陸俸親
齎本院告諭往諭爾等父老子弟因而查照本院十
家牌式通行編排曉諭使各民互相勸戒糾察痛懲
已往之惡共為維新之民爾等父老子弟其間知識
明達者蓋亦深思熟慮之世豈有不納糧不當差與
官府相對背抗而可以長久無事終免於誅戮者乎
世豈有恃頑樹黨結怨構仇劫衆拒捕不伏其辜而
可以長久無事終免於誅戮者乎就使爾等各有所
弟奴僕與爾抗拒背逆若此爾等當何以處之夫寧

王宸濠挾奸雄之資籍 宗室之勢謀爲不軌積十
餘年誘聚海內巨寇猾賊動以萬計奮其財力甲兵
之強自以爲無敵於天下矣一旦稱亂舉事本院奉
朝廷威令興一旅之師不旬日而破滅之如虜足雛
爾輩縱頑梗克悍自視以爲孰與宸濠吾若聲汝之
罪不過令一偏裨領衆數百立齏粉爾輩如机上肉
耳顧念爾等皆吾赤子其始本無背叛之謀止因規
利爭忿肆惡長奸日迷日陷遂至於此夫父母之於
子豈有必欲殺之心惟其悖逆亂常之甚將至於覆
宗滅戶不得已而後置之法苟有改化之機父母之

心又未嘗不欲生全之也前此官府免爾租稅蠲爾
債負除爾罪名而遂謂爾可以安居復業是終非所
以生汝吾今則不然不免爾租賦不蠲爾債負不除
爾罪名爾能聽吾言改惡從善惟免爾一死限爾一
月之內釋怨解仇逃稅者輸其賦負債者償其值有
罪者伏其辜吾則待爾如故爾不聽吾言任汝輩自
爲之吾心旣無不盡吾可以無憾矣爾後無悔

其二十八批江西都司掌管印信

十二月
十一

日

據江西都司呈看得三司各官推舉該衛所掌印僉

書等官頗已得宜俱依議指揮使錢山掌印指揮使朱章指揮僉事孫蘭佐貳僉書其指揮使魏清等管操管屯運糧巡捕及左所千戶黃振等各掌該所印信仰行按察司將本院原發貯庫印信看驗明白照議給領掌管茲當該衛改革之初仍行各官務在圖新更始端本澄源共惟同心同德之美以立可久可大之規不獨顯功業於當時必欲垂模範於來裔上不負 廟堂之特選而下可副諸司之舉任其或庸碌浮沉甚至欺公剥下豈徒敗其身名亦難免於刑憲其餘空閑各官觀其才識皆可器使但以缺少人

多未及盡用各官惟務持身勵志藏器待時但恐見用而無才勿慮有才而未用若果囊中之錐無不脫穎而出毋謂上人不知輒自頹靡是乃自棄非人棄汝矣俱仰備行各官查照施行仍備行巡按衙門知會繳

其二十九批江西按察司分巡該道

月十二

日十六

據江西按察司呈看得南昌湖西湖東九江各道地方兵亂之餘民窮財盡盜賊逢起劫庫掠鄉無月無警府縣各官事無綱紀申請旁午文移日繁政務日

廢仰各分巡官不時往來該道臨督所屬設法調度用其所長而不責其備教其不及而勿撓其權興廉激懦祛弊懲奸務以息訟弭盜康寧小民毋憚一身之勞終歲逸居省城坐視民患藐不經心俱仰備行各官查照施行繳

其三十牌行零都縣興舉社學

十二月二十七日

照得本院近於贛州府城設立社學鄉館教育民間子弟風俗頗漸移易牌仰零都縣掌印官即於該縣起立社學選取民間俊秀子弟備用禮幣敦請學行之士延為師長查照本院原定學規盡心教導務

使人知禮讓戶習詩書丕變偷薄之風以成淳厚之俗毋得違延忽視及虛文搪塞取咎

其三十一告示從逆官校人等

正德十六年正月初

五日

告示一應平日隨從逆府官校舍餘軍旗人等論罪俱在必誅雖經自首奉有詔宥據法亦當遷徙邊遠烟瘴之地但念其各已誠心悔罪故今務在委曲安全仰各洗心滌慮改惡從善本分生理保守身家毋得仍蹈前非或又投入各王府及鎮守撫按三司等衙門充作軍牢伴當皂隸防夫等項名目挾勢復

仇定行擒拏追坐從逆重刑知情容留官司叅究論
以窩藏逆黨同甲鄰佑不舉首者連坐已奏 請外
仰各遵照毋違

某縣某坊第幾甲

釋罪自新一戶

左隣 右隣

仰各隣毋念舊惡務要與之和睦相處早晚仍須勸
化鈐束毋令投入各府及鎮守巡撫按三司等衙門
充當軍牢伴當皂隸防夫等項名目挾勢害人定行
坐以知情容隱逆黨重罪決不輕貸

使人知禮讓戶習詩書丕變偷薄之風以成淳厚之
俗毋得違延忽視及虛文搪塞取咎

其三十一告示從逆官校人等

正德十六
年正月初

五日

告示一應平日隨從逆府官校舍餘軍旗人等論罪
俱在必誅雖經自首奉有 詔宥據法亦當遷徙邊
遠烟瘴之地但念其各已誠心悔罪故今務在委曲
安全仰各洗心滌慮改惡從善本分生理保守身家
毋得仍蹈前非或又投入各王府及鎮守撫按三司
等衙門充作軍牢伴當皂隸防夫等項名目挾勢復

不陽明別錄卷五
三
仇定行擒拏追坐從逆重刑知情容留官司叅究論
以窩藏逆黨同甲鄰佑不舉首者連坐已奏 請外
仰各遵照毋違

某縣某坊第幾甲

釋罪自新一戶

左隣 右隣

仰各隣毋念舊惡務要與之和睦相處早晚仍須勸
化鈴束毋令投入各府及鎮守巡撫按三司等衙門
充當軍牢伴當皂隸防夫等項名目挾勢害人定行
坐以知情容隱逆黨重罪决不輕貸

其三十二 牌行崇義縣知縣陳瓚查行十家

牌法 正月初十日

看得新開崇義縣治雖經本院委官緝理經畫大畧
規模已具終是草創之初經制未習該縣官員若不
假以威權聽其從宜整理則招徠安習之功亦未可
責效除行守巡兵備等衙門外牌仰知縣陳瓚上緊
前去該縣首照十家牌諭查審編排連屬其形勢輯
睦其鄰里務要治官如家愛民如子一應詞訟差徭
錢糧學校等項俱聽因時就事從宜區處應申請者
申請應興革者興革務在畜衆安民不必牽制文法

大抵風土習尚雖或有異而天理民彝則無不同若使爲縣官者果能殫其心力悉其聰明致其惻怛愛民之誠盡其撫輯教養之道雖在蠻貊無不可化况此中土郡縣之區向附新民本多善類我能愛之如子彼亦焉有不愛我如父者乎夫仁慈以惠良善刑罰以鋤兇暴固亦爲政之大端若此新民之中及各縣分割都圖人戶果有頑梗強橫不服政化者即仰遵照本院欽奉 勅諭事理具由申請即行擒拏治以軍法毋容縱恣益長刁頑

其三十三案行南昌道選揀兵士

正月三十日

照得南昌等處盜賊不時竊發欲行起調各處軍兵剿捕但春作方興兼且往來道路未免驚擾所據羊房校尉籍左衛軍旗人等先因從逆投首遇蒙 恩宥釋放近經本院 奏請免其罪戮遷徙見在省城屯住相應選用令其立功報效爲此仰抄案回道即將前項軍旗校尉人等盡數查點挑選膂力強壯者送赴軍門指授操演以憑調遣殺賊立功贖罪其軍民人等中間若有督力膽畧出衆願從殺賊報效者亦聽揀選聽用毋得違錯不便

其三十四牌行奉新縣典史徐誠調選兵夫

二月十一日

牌仰典史徐誠即行調選羅坊等處驍勇憤戰兵夫
 四百名各備鋒利器械就仰該縣官於堪動銀兩內
 先行給與口糧二月統領星夜前赴安義縣聽憑通
 判林寬調度追剿獲功人負一體從重給賞但有不
 遵號令及逗遛退縮擾害平人者仰即遵照本院欽
 奉勅諭事理聽以軍法從事本官務要申嚴紀律
 整束行伍必使所過之地秋毫無犯所捕之賊噍類
 不遺庶稱委任如或縱弛怠忽致有疎虞軍令具存
 罪亦難貸

其三十五牌行饒州南康九江等府剿殺安

義逆賊

二月十三日

看得安義逆賊已經本院嚴督官兵四路邀截誠恐
 無所逃竄或歸衝縣治除行知縣熊价專一防守縣
 治以守為戰通判林寬專一追剿逃賊以戰為守及
 行都指揮馮勳選領南昌府衛軍快督兵截剿外牌
 仰饒州南康九江府掌印官知府張愈嚴王念等各行起集兵快
 身自督領於沿湖要害邀截迎擊仍督令餘干樂平建昌湖口
 彭澤等縣掌印官領兵把截沿湖緊關隘路江口毋令此賊得以
 出境遠遁一面多差知因鄉道探賊向往互相傳報

合勢粘踪追剿一應機宜俱聽從宜區處各官務要
竭力殫智殺賊立功以靖地方毋得畏縮因循輕忽
踈畧致賊滋蔓軍法具有罪難輕貸

其三十六牌諭都指揮馮勳等振旅還師

二月二
十三日

牌諭都指揮馮勳通判林寬典史徐誠等本月二十
一日據知縣熊价所稟已知叛賊略平所漏無幾俟
餘黨一盡各官即可振旅而還就將所擒叛賊通行
牢固綁縛分領解赴軍門各官在途務要肅整行伍
申嚴紀律禁緝軍兵不得犯人一草一木今差叅隨

官詹明賚執各官原領令旗令牌監軍而回但有
違令侵擾於人者即行斬首示衆其奮命當先被殺
彼傷義勇之士及獲功人役各官務要從公從實開
報以憑優恤給賞不得互分彼此輒有偏私輕重但
能推功讓美者勤勞雖微亦在褒賞若有爭功專利
者功蹟雖茂亦從擯抑其奉新兵快往年從征多犯
禁令今旣効有勤勞尤宜保全始終毋蹈前非自取
軍法重罪知縣熊价不必解賊且可在縣撫安彼擾
軍民令各安居樂業旣行申嚴十家牌諭互相保障
仍量留九姓義勇分班守縣候事體定帖以漸散回

其三十七批東鄉民投順訴狀

四月初九日

據東鄉縣民陳和等連名訴看得 朝廷添設縣治本圖以便地利而順民情但割小益大安仁之民既稱偏損亦須為之處分在官府自有通融裁制各民惟宜聽順果有未當又可從容告理而乃輒稱兵背抗稔惡屢年愈撫愈甚不得已而有擒捕之舉亦惟彰 國法禁頑梗小懲大戒期在安輯撫定非以必殺為快也今各民既來投順官府豈欲過求但未審誠偽恐因擒捕勢迫暫求投順以求延緩亦未可知仰按察司會同都布二司官將各情詞備加詳審及

查立縣始末緣由其各都圖應否歸附某縣各縣糧差應否作何區處各民違抗逃叛之罪應否作何理斷通行議處呈奪安集反側

其三十八批瑞州知府告病申

正德十六年五月初

看得知府胡堯元始以忠義興討賊之功繼以剛果著及民之政雖獲上之誠或有未孚而守身之節初無可議據申告病情由亦似意有所為大抵能繫矩者必推已及人當大任者在動心忍性仰布政司即行本官照舊盡心管理府事毋因一朝之忿遂忘三

反之功事如過激欲抗彌卑理苟不渝雖屈匪辱此
繳

其三十九牌行南昌道賑恤水災

五月初五日

據南康建昌撫州宜黃等縣申稱非常水災乞賜大
施賑恤急救生靈流移等情看得洪水非常下民昏
墊實可傷憫但計府縣所積無多實難溥賑其地方
被水既廣而民困朝不謀夕若候查實報名造冊給
散未免曠日遲久反生冒濫已行二府各委佐貳官
及行所屬被水各縣掌印等官用船裝載穀米分投
親至被水鄉村驗果貧難下戶就便量行賑給爲照

南昌所屬水災尤劇但居民稠雜數多頑梗若賑給
之時非守巡臨督於上或致騰踴紛爭爲此仰分
南昌官吏即便分督該府縣官於預備倉內米穀用
船裝運親至被水鄉村不必揚言賑飢專以踏勘水
災爲事其間驗有貧難下戶就便量給升斗暫救目
前之急給過人戶畧記姓名數目完報查考不必造
冊擾害所至之地就督各官申嚴十家牌諭通加撫
慰開導令各相安相恤仍督各官俱要視民如子務
施實惠不得虛文搪塞徒費錢糧無救民患取罪不
便

其四十牌行江西臨江府賑恤水災

正月
初七日

據臨江府新喻縣申稱今年自春入夏淫雨連綿田地衝成江河沙石積成丘陵即今四野一空秋成絕望要將本縣在倉稻穀賑濟緣由為照臨江一府被水縣分恐亦非止新喻合就通行為此牌仰本府官吏即便分委佐貳等官及行所被水各縣掌印佐貳等官將在倉稻穀用船裝載或募人夫挑擔親至鄉村踏勘水災驗果貧難下戶即便量給升斗暫救目前之急就各申嚴十家牌諭通加撫慰開導令各相

安相恤各官務要視民如子務施實惠不得虛文塞徒費錢糧無救民患若其間事勢可緩或行或止徑自因時斟酌施行不必拘定一議

其四十一案仰湖廣布按二司優恤冀元亨

家屬
五月二十日

照得湖廣常德府武陵縣舉人冀元亨忠信之行孚於遠邇云云已經備咨六部院寺等衙門詳辨去後今照冀元亨該科道等官交章申暴各該官司辨無干碍先已釋放不期復染瘧痢身故該部司屬官員及京師賢士大夫莫不痛悼相與資給衣棺本院亦

已具舟差人扶柩歸葬但恐本生原籍官司一時未知詳悉仍將家屬羈監未免枉受淹禁除將本生節義另行具本奏請褒錄外擬合通行爲此牌仰抄案回司即行常德府速將舉人冀元亨家屬通行釋放財產等項亦就查明給還收管仍將本生妻子特加優恤使奸人知事久論定之公而善類無作德降殃之惑其於民風士習不爲無裨矣

其四十二案行嶺北道停革龜角尾抽分

五月二十日

照得先因南贛等處盜賊生發調兵征勦而糧餉缺

乏隨該本院奏奉 欽依於龜角尾抽分廠將東西二關往來客貨照例抽稅以助軍餉續准戶部咨稱地方事寧商稅相應停止已行嶺北道遵照禁止訖正德十四年六月內爲因江西反叛本院駐兵吉安通行各府州縣調兵征勦費用錢糧浩大當即遵照欽奉 勅諭一應軍馬錢糧事宜俱聽便宜區畫事理案行贛州府照舊委官抽分以助軍餉今照反逆已平盜賊亦頗停息所據抽稅合且查革若日後果有緊急軍情再行議處爲此仰抄案回道即將龜角尾抽分自本年六月初五日爲止就行查革仍出告

示曉諭客商人等知悉其南安折梅亭抽分係先年
奏 准事例該府仍舊抽稅以助軍餉毋容侵尅務
禁下人不許騷擾客商仍將贛州府自奉本院明文
抽分起并以前在庫商稅銀兩通行查明已用若干
見在若干就拘銀匠辨驗成色責令吏庫人等秤封
收貯非奉本院明文分文不許擅支敢有故違定行
拏究决不輕貸

其四十三批江西按察司故官水手呈

六

初七日

案據江西按察司呈備雲南洱海衛軍籍李和告稱

伊父僉事李素病故緣由看得僉事李素處心和易
居官清謹生既無以為家死復無以為殮寡妻弱妾
旅覲萬里死喪之哀實倍恒情該司議欲加撥長夫
水手護送非獨僚友朋友之情實亦惇廉周急之義
准議行令各府僉撥長夫水手照例起關差人護送
還鄉

其四十四牌行江西按察司問擬罪犯王鼎

六月十五日

照得本院於正德十四年六月內因寧王謀反起兵
征勦具本奏 聞當差贛州衛舍人王鼎賈奏却乃

設計詐病推託不前顯有通賊情弊及至擒獲逆賊差管繫關題本赴京奏報却又迂道私赴太監張忠處捏謗軍中事情幾至釀成大變及將原領題本通同邀截回還所據本犯罪難輕貸為此牌仰本司即將發去犯人王鼎從公問明白依律議擬具招呈詳毋得輕縱未便

其四十五牌行江西按察司清查隨軍糧餉

六月十六日

卷查先該本院督解宸濠中途奉 旨仍解回省隨將各項賞功銀牌花紅綵段及糧餉等項牌差縣丞

等官龍光等解發江西按察司查收貯庫仍候本院明文施行去後今照前項糧賞等銀已支未支通未清查應該起解者未審曾否盡數解京擬合查報為此牌仰本司即查原發糧賞等銀各計若干要見於何月日奉本院批呈或紙牌支取某項若干給與某起官軍人等行糧或犒勞兵快應用其應解金冊一十二付上高新昌王印二顆銀盆六面及衣服等件曾否盡數解京中間有無遺漏等情備查明白具數回報以憑查對稽考毋得遲延未便

留處江西事宜

其四十六奉 勅赴京案照

六月十六日

照得當職於正德十六年六月十六日奉 勅行取赴京即日起行所有撫屬大小衙門呈申一應公文合行處置為此仰抄案回司凡遇所屬府衛申呈及兩京部院咨行公文或差人領賚到來即便收候新任巡撫至日類送查照其福建廣東湖廣各官呈申俱仰賚至贛州嶺北道投下亦候新任提督開送定奪各給收照付原差回銷俱毋違錯

其四十七案照江西都布按三司并南昌府

六月十八日

照得當職

云

啓行仰抄案回府即將本院未完事

件及暫發監問人犯果有重大事情就呈巡按衙門區處若事情輕小徑自查審發落毋令久禁人難仍候提督巡撫至日通行呈報查考

其四十八牌行南昌府防守錢糧文卷

六月

十九日

照得當職近奉 勅旨行取赴京所有本院衙門見有軍機錢糧各項勘合詞訟等項文卷為因居住未定陸續盤檢亂雜向未清理即今暫收大廳左廂房內及合用什物亦收衙內必須撥人防守庶免疎失

爲此牌仰本府官吏即行南新二縣各差地方總小
甲或均徃皂隸數名晝夜看守仍差官不時巡察防
範及將應閉門戶亦即封鎖停當每日取各巡察官
員并地方人等不致違悞踈失結狀在官聽候新任
巡撫到日查考施行

其四十九仰南康府勸留教授蔡宗充

月六

據南康府儒學申看得教授蔡宗充德任師儒心存
孝義今方奉慈母而行正可樂英才之化况職主白
鹿當宋儒倡道之區勝據匡廬又昔賢棲隱之地偶
有親疾自可將調輒興掛冠之請似違奉檄之心仰

布政司備行南康府掌印官以禮勸留仍與修葺學
宮供給薪水稍厚養賢之禮以見崇儒之意繳

其五十批江西布政司禮送致仕官呈

月六

二十
五日

據江西布政司呈查勘新建知縣李時告送僉事李
素喪歸雲南任內無礙緣由看得知縣李時所呈量
才能而知止已見恬退之節因友喪而求去尤見交
誼之敦既經查勘明白亦合遂其高致仰司即行該
府聽令本官以禮致仕動支無碍官銀置備綵帳羊
酒從厚送餞加撥長夫水手資送還鄉該司仍將本

官致仕緣由行原籍官司用彰行誼之美以爲風俗之勸繳

陽明先生別錄卷之十二

